

摘藻堂四庫全書薈要

集部

欽定四庫全書蒼要卷一萬三千七百二十一

集部

毘陵集卷六

唐 獨孤及 撰

議 九首

景皇帝配昊天上帝議

故太保韓國公贈太師苗晉卿謚議

故御史中丞盧奕謚議

故左武衛大將軍使持節隴右節度經畧大使

兼鴻臚卿御史中丞贈涼州都督太原郡開國

公郭知運謚議酬答

三首

故江陵尹兼御史大夫呂諲謚議并酬答

三首

行狀

一首

唐故尚書祠部員外郎贈陝州刺史裴公行狀

議

景皇帝配昊天上帝議

謹按禮經王者禘其祖之所自出以其祖配之凡受命

始封之君皆為太祖繼太祖以下六廟則以親盡迭毀而太祖之廟雖百代不遷此五帝三王所以尊祖敬宗也故受命於神宗禹也而夏后氏祖顓頊而郊鮌續禹黜夏湯也而殷人郊冥而祖契革命作周武王也而周人郊稷而祖文王則明自古必以首封之君配昊天上帝唯漢氏崛起豐沛豐公太公皆無位無功德不可以為祖宗故漢以高皇帝為太祖其先細微故也非足為後代法伏惟太祖景皇帝以柱國之任翼周弼魏肇啟

王業建封于唐高祖因之遂以為有天下之號天所命也亦猶契之封商后稷之封邰禘郊宗祖之位宜在百代不遷之典郊祀太祖宗祀高祖猶周之祖文王而宗武王也今若以高祖創業當躋其祀是棄三代之令典遵漢氏之末制黜景皇帝之大業同於豐公太公之不祀返古違道罪孰甚焉夫追尊景皇帝廟號太祖高祖太宗所以崇尊尊之禮也時更七聖載經二百名臣碩儒備經討論未嘗有獻同異於宗廟今將議其全典變

更先聖制度曷知其可若配天之位既易則太祖之號  
宜廢祀之不修廟亦當毀尊祖報本之道其墜於地乎  
漢制擅議宗廟以大不敬論今武德貞觀之憲章未改  
國家方將敬祀事以和神人禘郊之間恐非所宜以言  
謹稽禮之舊文參諸夏殷周漢故事配食天帝之制請  
仍舊典謹議

故太保韓國公贈太師苗晉卿謚議

太師稟天純懿為唐股肱兩朝當國庶績唯允論道賦

政送往事居協恭秉彛動罔違德惠和以懋其事明哲  
以保其身昔嘗懸衡九流剖竹四郡刀尺之下無滌用  
襦袴之間無貧人洛陽居守東夏輯睦天寶之季二京  
為戎皇輿西狩億兆左衽大師踐危機不易心處橫潰  
不忘國奮身拔蹟于豺狼之口道不污而節不奪忠之  
大者至德乾元年中天下多故皇綱未張肅宗循漢宣  
故事用刑名繩下而太師以曹叅為師持清靜守職勵  
翼王度將順事典人亦寧一厥猷茂焉能知人能官人

慎選乃僚言刈其楚至有拔羣萃而取公器不五六年  
比肩袞職者光映策府當代榮之漢史稱胡廣與故吏  
陳蕃並為三司太師有焉夫九德咸事寬為之首百工  
惟時能哲則惠宜其享天眉壽為國元老古者生以行  
觀其志歿以諡易其名諡之美惡視行之大小後代或  
三字以表其德貞惠文子是也或二字以彰善鄼文終  
侯留文成侯是也蓋有績大名盛則禮優諡崇太師德  
冠搢紳位侔周召將加誅諡之制宜以鄼留為準謹按



大戴禮體和居中曰懿文資有成曰獻稽千戴之令典  
合二名以配德請諡曰懿獻謹議

故御史中丞盧奕諡議

盧奕剛毅樸忠直方而清勵精吏事所居可紀天寶十  
四載洛陽覆歿于時東州人士狼狽鹿駭猛武磨牙而  
爭其肉居位者皆欲保性命而完妻子或競先策高足  
爭脫羿彀或不恥苟活甘飲盜泉奕獨正身守位義不  
去以死全節誓不辱勢窘力屈以朝服受執猶忼慨憤

數賊梟獍之罪觀者股慄亦不變其色西向而辭君然  
後受害雖古烈士方之者鮮矣或曰洛陽之存亡操兵  
者實任其咎非執法吏所能抗師敗將犇去之可也委  
身寇讐以死誰懟及以為不然勇者禦忠者守必社稷  
是衛則生死以之危而去之是智免也忠於何有蓋荀  
息殺身於晉不食其言也仲由結纓於衛不避其難也  
玄冥懃其官而水死守位而忘軀也伯姬待保姆而火  
死先禮而後身也彼四人者死之日皆於事無補夫豈

愛死而賈禍也以為死輕於義故蹈義而捐生古人書之使事君者勸然則祿山之亂大於里克孔惺廉察之任切於玄冥之官分命所繫不啻保姆逆黨兵威烈于水火于斯時也能與執干戈者同其戮力挽之不來推之不去豈不以師可虧義不可苟身可殺節不可奪故全其操持于白刃之下孰與夫懷安偷生者同其風哉謹按諡法圖國忘死曰貞秉德遵業曰烈奕執憲戎馬之間志藩王室可謂圖國矣危不能救而繼之以死可

謂忘死矣歷官十一任言必正事必果而清節不撓去  
之若始至可謂秉德先時黃門以直道佐時奕嗣之以  
忠純可謂遵業請謚曰貞烈謹議

故左武衛大將軍使持節隴右節度經畧大使兼  
鴻臚卿御史中丞贈涼州都督太原郡開國公  
郭知運謚議酬荅 三首

博士獨孤及議曰郭知運驍勇有謀善用兵起行間為  
唐大將當時唐興百餘載矣天下充富太倉有二十年

之蓄玄宗循漢武故事方銳意拓土知運適與時會遂  
乘天威奮其材力敢與虜确故能破默啜可汗以靖北  
庭敗吐蕃誅康待賓隴坻以西烽火為息慰薦麾下吏  
士任必才往往超倫績用茂著王君奭以果勇代處分  
閭之寄牛仙客出將入相以清幹信謹稱斯又獎拔之  
明也當時議者謂知運與郭虔瓘王晙薛納並為中興  
名將至今隴上將士思之或有起祠宇於故城遺壘尸  
而祝之者上元中肅宗加太公望以武成王之號知運

列于配食之位則是勲伐事業宜有以美稱易其名者  
謹按諡法服叛懷遠曰威易曰厥孚威如繫辭曰弧矢  
之利以威天下虞書曰董之用威傳曰非威非懷何以  
示德則威者聖人所以佐仁義以齊天下者也施於名  
號可以表將帥之德請諡知運曰威謹議

左司員外郎崔履議曰郭知運承恩詔葬向五十年今  
請易名竊恐非禮謹按禮經云禮時為大又曰過時不  
為禮也昔衛公叔文子卒將葬其子戌請諡於君曰日

月有時將葬矣請易其名者蓋時不可踰也節度既名  
不浮行數紀之間前門生故吏已合謀謚今乃申請竊  
將有為而作節度嗣子英又頃屬多故屢制方隅朝廷  
策勲位表端揆附從者竊不中之禮會無妄之求况節  
度當開元之初賄贈特加碑誌並建皆出恩命追悼之  
遇亦已當矣今又鹵莽外於典章追送往之闕遺啟將  
來之冒昧况今列土者接畛專征者百輩若率而行之  
誰曰無請不唯有司疲於簡牘抑恐名器等於草芥雖

欲曲全竊將不可又禮經云以孤暴貴不為父作謚若節度合謚而不以其時則嗣子廢先君之德若不合謚而苟遂其志則先君因嗣子而見尊以僕射而言之恐貽越禮之讓以國家而言之又殊旌善之體請下太常重議謹議

博士獨孤及議曰禮時為大順次之葬將易名時也有故闕禮追遠請謚順也假如諸侯五月而葬魯惠公之薨也有宋師至隱公元年十月而改葬不以踰時廢禮



又公叔戌請諡適當葬前謹按禮經曾不言已葬則不可追諡况帝王殊途不相沿襲新禮則死必有諡不云日月有時今請易名者五家無非葬後苗太師一年矣呂諲四年矣盧奕五年矣顏真卿八年矣並荷褒寵無異同之論獨知運其以子不幸遂以過時見抑苟必以已葬未葬為節則八年與五年其緩一也而與奪殊制無乃不可乎議云已孤暴貴不為父作諡此謂其父無位而子居大官不當以已之貴加榮於父也禮不云乎

父為士子為大夫葬以士禮若知運者處方面既位列  
九卿茂勲崇名與衛霍侔飾終之禮宜加於他將一等  
豈待因依嗣子然後作謚今之專征者雖逢風雲化為  
侯王其祖父爵位與知運齒者鮮矣奈何懼名器等於  
草芥以是殺禮竊謂近誣乾元以來累有詔追贈百官  
祖父内外文武具寮之先悉蒙恩錫或音徽久沫或墓  
木已拱受大名貴位於九原者以萬數未嘗以沒代遠  
近為限夫贈謚一也贈者一時之寵謚者不刊之令今

以歲久而廢易名是王澤決於天下而獨隔於一人也  
當開元二年吐蕃以舉國之師入京五原塞擊柝之聲  
聞於咸雍知運與郭虔瓘討平之以張王室當時微知  
運則汧隴之西左衽是懼今朝廷方出將以征不服討  
不庭宜褒寵之以勸握兵者安可以葬久而廢大典况  
夫謚法者蓋考其言行事業之邪正必以字褒貶之使  
生者聞其美謚而慕覩惡謚而懼不待賞罰而賢不肖  
皆勸是一字之謚賢於三千之刑本非為沒者之子孫

以為哀榮寵贈之具假令知運無子且未嘗立勲苟位  
至上將則謚不可廢豈以其子之存亡為請謚之可否  
竊稽載籍徵諸舊章易名之禮請如前議謹議

故江陵尹兼御史大夫呂諲謚議并酬荅

三首

呂諲任職從政聰敏肅給能以才智潤飾吏道至德中  
與三司同鞠大獄獨引律文附會經義而平反之當時  
卒用中典諲參其論在台司齟齬雖無匪躬之能然平  
章法度守而勿失其為荊州一年有成號令明具賦歛

均一物有制而事有倫大抵以威信為主戮陳希昂按  
申太芝之奸而三楚之人悅服厥功茂焉自至德以來  
荷推轂受賑之寄處方面者數十輩而將不驕卒不墮  
政修人和如譚者蓋鮮矣豈不以人散久矣而兵未戢  
挹濁流者難俟清整焚絲者難為功譚當此時能以慈  
惠易其疾苦且訓其三軍如臂使指闔境無拔葵噉棗  
之盜而楚人到于今猶歌詠之此其才略必有過人者  
雖欲勿褒之其可乎按謚法威德克就曰肅禁暴威也

愛人德也考禮議名而擬諸形容請謚曰肅謹議

度支員外郎嚴郢議曰伏以故相國江陵尹兼御史大夫贈吏部尚書呂公諲昔事先朝累當大任至德之初天步艱難公首披荊棘扈蹕靈武忘軀進忠一日三接先朝察匪躬之節納沃心之議爰立作相弼諧神人其嘉謀嘉猷獻可替否之跡入則造膝出則詭辭溫樹不言難可得而知也至有爛焉明白欲蓋而彰者請區而載之乾元收復之際兩都衣冠多繫於三司詔獄御史

中丞崔良器議事失入時宰相苗太師崔趙公等雖庭  
諍之然未堅決公有犯無隱引經正辭上是其言刑為  
之省所全活者蓋數百人明主收雷電之威聖朝行寬  
大之典者繫公之力也古者進賢受上賞書不云乎咎  
繇曰都在知人公踐台衡專以推賢任人為務故相國  
房公琯故吏部尚書韋公陟入登左職皆公之由今相  
國黃門侍郎杜公之蒞江陵也公薦在方面之任今相  
國中書侍郎元公之在度支也公咨以幕府之政曾未

數歲而二相接武于上台天地交泰聖賢相得庶績咸  
熙五典克從者資公之舉善也則子皮之舉子產鮑叔  
之舉管仲蕭何之舉曹叅武侯之舉蔣琬方之前人我  
有餘地其在荆南也戢兵和衆令行禁止理績為天下  
最雖古之羊杜無得而踰今太常議荆南之政詳矣而  
曰在台司齷齪無匪躬之能者乃抉瑕掩德之論非適  
中之言也國家故事宰臣之謚皆有二字以彰善旌德  
焉夫以吕公文能無害武能禁暴貞則幹事忠則利人



盛烈宏規不可備舉傳叙八元之德曰肅忠恭懿若以美謚擬於形容請謚呂公曰忠肅謹議

博士獨孤及議曰呂誼任宰相日淺當時會肅宗躬親萬幾庶政羣臣畏威奉職而已雖有謨謀於巖廊之上莫由有知之者及其荆門之政為仁由已其略見於事其恩惠被於物其風謠存乎人故得而稱之議名之際敢不闕其所疑而錄其尤著者有司之職也其間實詔獄在未執政之前前議議之詳矣敢辱再告至若推進

名公使登大任既同溫室之樹且行狀實所不載孔子  
曰君子於其所不知蓋闕如也故不書今奉符令必用  
二字且以忠配肅謹按舊儀凡歿者之故吏得以行狀  
請謚于尚書省而考行定謚則有司存朝廷辯可否  
宜在衆議今駁議撰謚異同之說並故吏專之伏恐亂  
庖人尸祝之分違公器不私之戒且非唐虞師錫僉曰  
之道昔周道衰孔子作春秋以繩當代而亂臣賊子懼  
謚法亦春秋之微旨也在懲惡勸善不在哀榮在議美

惡不在字多文王伐崇周公殺三監誅淮夷晉重耳一  
戰而霸諸侯武功盛矣而皆諡曰文以冀缺之恪德臨  
事甯俞之忠於其國隨會之納諫不忘其師言身不失  
其友其文德不優乎而並諡曰武固知書法者必稱其  
大而略其細故言武不言文言文不言武三代以下朴  
散禮壞乃有二字之諡二字諡非古也其源生於衰周  
施及戰國之君漢興蕭何張良霍去病霍光俱以文武  
大畧佐漢致太平其事業不一謂一名不足以紀其

善於是乎有文終文成景桓宣成之謚雖瀆禮甚矣然猶褒不失人唐興參用周漢之制謂魏徵以王道佐時近文直言極諫愛君而忘身近貞二德並優廢一莫可故曰文貞公謂蕭瑀端直鯁亮近貞性多猜貳近褊言褊則失其審正稱貞則遺其吝狹非一言所能名故曰貞褊公其餘舉凡推類大抵准此皆有為為之也若跡無殊途事歸一貫則直以一字目之故杜如晦謚成封德彝謚明王珪謚懿陳叔達謚忠溫彥博謚恭岑文本

謚憲常巨源謚昭唐休璟謚忠魏知古謚忠崔日用謚  
昭其流不可悉數此並當時赫赫以功名居宰相位者  
謚不過一字不聞其子孫佐吏有以少稱屈者由此言  
之二字不必為褒一字不必為貶若褒貶果在字數則  
是堯舜禹湯文武成康不如周威烈王慎靜王也齊桓  
晉文不如趙武威魏安釐秦莊襄楚孝烈也杜如晦王  
珪以下或成或明或懿或憲不如蕭瑀之貞褊也歷考  
古訓及貞觀以來制度似皆不然今奉所議云國家故

事宰相必以二字為諡未知出何品式請具示謹當以  
為按據若忠者臣事君之常道苟靖恭于位誰則非忠  
非有炳然之異則不以為諡至如議獄緩死任賢舉善  
德之美者然肅者威德克就之名足以表之矣月令曰  
孟秋天地始肅詩曰曷不肅雍又曰肅肅王命仲山甫  
將之肅嚴也敬也忠之屬也天地不肅則歲不成宗廟  
不肅則禮不立軍旅不肅則人不服肅之時義大矣哉  
以諲之從政也威能閑邪德可濟衆故以肅易名而忠

在其中矣亦猶隨會甯俞之不稱文豈必因而重之然後為美魏晉以來賈詡之籌筭賈逵之忠壯張既之政能程昱之智勇顧雍之密重王渾之器量劉惔之鑒裁庾翼之志略彼八君子者方之東平宜無慙德死之日並謚曰肅當代不以為貶何嘗徵一字二字為之升降乎謹上稽前典下據甲令叅之禮經而究其行事請依前謚曰肅謹議

行狀

唐故尚書祠部員外郎贈陝州刺史裴公行狀  
曾祖仁基隋光祿大夫行左光祿大夫皇朝贈  
使持節都督原州諸軍事原州刺史諡曰忠  
祖行儉皇朝銀青光祿大夫禮部尚書聞喜縣  
開國公贈太尉揚州大都督諡曰獻

父光庭皇朝光祿大夫行侍中兼吏部尚書正  
平縣開國男贈太師諡曰忠獻

絳州聞喜縣崇慶鄉太平里裴稹年若干行狀



公天姿英拔德宇宏曠顥昂公器磊砢高節武庫森戟

玉山照人起家以門調補千牛脩身歷太子通事舍人  
太常寺主簿是時萬邦方乂獻公當國天子垂衣穆清  
以有天下而袞職之闕疇咨之府公入則竭力出則匪  
躬外詢輿人以備過庭之問陰薦多士用弘審官之選  
既而濟濟俊乂爛盈東閣邦之得賢於斯為盛畫一之  
詩作而嘉魚之頌興公之裕蠱也轉京兆府司錄叅軍  
輦轂之大綱轄之劇牒訴浩穰文墨填委公投及餘地

而大邳斯批若網在條而衆目不紊談笑之隙簿領肅  
如論者知逸驥之足方自此始開元十一年獻公捐館  
惇然在疚哀越乎禮會執事者醜正作福怙寵匿怨乃  
因喪乘釁將逞憾于我言之如簧上亦投杼公乃銜恤  
進牘叫閹抗憤危言自明至誠旁感由是宗祏垂祉高  
天聽迴恩方照微神亦悔禍卒令臧孫有加等之葬公  
業有不忘之歎公之克家也服闋授起居郎載筆赤墀  
書法不隱開元二十四年三庶人以罪廢事出宮闈變

生飛語時壽王以母寵子愛議者頗有奪宗之嫌道路  
憫默朝野疑懼公乃從容請問慷慨獻諫上述新城之  
殷鑒下陳戾園之元龜謂興亡之由在廢立之地天子  
感悟改容以謝因詔以給事中授公公曰陛下絕招諫  
之路為日固久今臣一言而荷殊寵則言者衆矣何以  
錫之上善其敏而多其讓乃止不拜尋除尚書祠部員  
外郎恪居禮闈休問惟穆弘濟之略因為已任于時縉  
紳高議方以青雲期公不弔昊天降此短歷開元二十

九年某月日薨于第春秋若干君子謂公貂蟬之葉瑚  
璣之器壽不及黃耆名不登明堂天其未亡狐趙之勲  
成宣之德也非昌其身必大於後果介繁祉有才子四  
人長曰倩尚書駕部員外郎兼殿中侍御史江西道租  
庸鹽鐵等使次曰徹尚書司勳員外郎兼殿中侍御史  
叅中軍元率雍王軍事次曰倚殿中侍御史試守萬年  
縣令季曰侑太原府榆次縣尉構厦瓌材切玉利器價  
敵三虎族擬八王朝廷褒之方倚以成務元年春建辰

月肆大眚命有司錄勲追舊於是詔贈公諫議大夫猶以禮未超倫位不充德秋八月詔曰贈諫議大夫裴某操履貞純器能溫敏素推雅望嘗踐清班志業屈於當時風猷悲於既往顧其胤嗣久在周行雖禮及前修已申追遠而恩霑後命宜有贈榮俾高列岳之班更表重泉之飾可贈使持節陝州刺史禮也公天機超邁雅有大略氣直而溫性擾而毅貞可幹事善足救物外坦蕩豪舉朗然不羈內敦敏純固忠而能力至若輕死重義

貴身賤名視錢帛如糞土戲公卿若草芥其於履危機  
臨大節則氣冠賁育勁侔風霜未嘗以得喪夷險蕞芥  
於胷臆詩云昭明有融高朗令終公實有焉謂宜荷天  
之休俾熾而大龍泉未試隙駟先徃天乎斯才而有斯  
壽今寵優以命澤及九原已伸追遠之恩請遵易名之  
典

寶應二年某月日故吏某官某謹上

尚書省考功夫存以行觀其志沒以謚表其德則名實

不虧善惡知勸謹按故尚書祠部員外郎贈使持節陝  
州刺史裴稹鼎鉉公族珪璋令名孝克負荷忠能匡諫  
宏圖方壯利涉未息舟壑遽遷音徽已沫命官褒德合  
荷寵章考行飾終敢徵前典謹上

毘陵集卷六

欽定四庫全書薈要卷一萬三千七百二十二

集部

毘陵集卷七

唐 獨孤及 撰

銘 三首

仙掌銘

并序

古函谷關銘

并序

洪州大雲寺銅鐘銘

頌



慶鴻名頌并序

碑

陳留郡文宣王廟堂碑銘并序

阮公嘯臺頌并序

論

吳季子札論

銘

仙掌銘并序

陰陽開闔元氣變化泄為百川疑為崇山山川之作與  
天地並疑有真宰而未知尸其功者若巨靈鼉鼉攘臂  
其間左排首陽右拓太華絕地軸使中裂坼山脊為兩  
道然後導河而東俾無有害留此巨跡於峯之顛後代  
揭厲於玄蹤者聆其風而駭之或謂詭詭不經存而不  
議及以為學拘其一域則惑於餘方曾不知創宇宙作  
萬象月而日之星而辰之使輪轉環遶箭馳風疾可駭  
於俗有甚於此者徒觀其陰隲無朕未嘗駭焉時而巨

靈特以有跡駭世世界惑矣天地有觀陰陽有藏煅煉  
六氣作為萬形形有不遂其性氣有不達於物則造化  
者取元精之和合而散之財而成之如埏埴鑪錘之則  
為瓶為缶為鈎為棘規者矩者大者細者然則黃河華  
嶽之在六合猶陶冶之乃有瓶缶鈎棘也巨靈之作於  
自然蓋萬化之一工也天機冥動而聖功啓元精密感  
而萬物應故有無跡之跡介於石焉可以見神行無方  
妙用不測彼筦窺者方循跡而求之揣其所至於巨細

之際則道斯遠矣夫以手執大象力持化權指揮太極  
蹴踏顓氣立乎無間行乎無窮則捩長河如措盃擘太  
華若破塊不足駭也世人方以禹鑿龍門以導西河為  
神奇可不為大哀乎峩峩靈掌纖指如畫隱鱗磅礴上  
揮太清遠而視之如欲捫青天以掬皓露攀扶桑而捧  
白日不去不來若飛若動非至神曷以至此唐興百三  
十有八載余尉於華陰華陰人以為紀崤崤勒之罟頌  
嶧山銘燕然舊典也玄聖巨跡豈帝者巡省伐國之不

若歟其古之闕文以俟知言歟仰之嘆之斐然琢石為志其詞曰

天作高山設險西方至精未分川壅而傷帝命巨靈經啓地脈乃眷斯顧高掌遠跼砉如剖竹騁若裂帛川開山破天動地坼黃河太華自此而闢神返而極跡挂石壁跡豈我名神非我靈變化翕忽希夷杳冥道本不化生亦無形天何言哉山川以寧斷鼇補天世未觀焉夸父愚公莫知其蹤屹彼靈掌懸諸龍從介二大都亭亭

高聳霞綈煙噴雲抱花捧百神依憑萬峯朝拱長於上  
古以閱羣動下視衆山蟬蟬蟻蟻彼邦人士永揖遺烈  
瞻之在前如揭日月三川有竭此掌不滅

古函谷關銘

并序

王者建邦經野觀象立極於是有重門擊柝以待暴客  
故封略土宇守在關塞山川丘陵為之城池天作峭函  
俾屏京室崇山迴合連岡藪倚長河屈盤萬里來東崖  
奔嶺蹙谷抱溪鬪崛起重險為秦東門截函夏於閭闕

鎖天府於戶牖外扼九州之咽喉故百二形焉內擁六合之輿區故霸王出焉當其中原鹿駭戰國蝟起嬴氏建瓴山東擇肉宇內持戟百萬連衡此關是時也開關而九國師遁振策而二周鼎入奄有大寶遂吞中區及江返秦壁天祐漢祚高皇帝提劍而西以遏亂略斬白帝繼降王舉漢中平咸陽廓金城以建都活萬姓於三章取威定功此焉是保粵若詢事國諜聆風仙籙則真氣靈蹤起乎其中柱史一去流沙萬里留玉函於舊宅

傳寶圖於本枝豈上帝乃眷興王是感不然何錫羨開  
國如此其盛耶太歲在大火余適下陽停驂塞門憑覽  
舊國衿帶如故世道不留秦餘空山漢為茂草恐復舟  
失於壑岸化為谷萬載之後昧者不知乃刻頌此石以  
示來裔其詞曰

天地雷雨英雄交爭設險守國作藩於京姓易時移山  
空塞平千秋陵谷想見精靈仙駕長往雄圖杳冥何以  
志之勒銘巖扃



洪州大雲寺銅鐘銘

叅變化孕律呂和神人莫疾於聲故天地以雷震萬物  
聖人以樂節八風佛土以鐘警六時天造聖作同符異  
貫自真乘開設其輪三轉像教不墜而法鼓之製存彤  
彤蓮宮于江之濱萬井在其前善惡興乎人將欲誕敷  
我法音啟迪我善根我是以作萬鈞之鐘大其器所以  
昭其度也侯誰尸之長者杜海泊此方上士釋法觀精  
鸞與比丘衆百三十有五人實果其願將辨所作於時

火官金工修厥戒令法陰陽九六之數以合造化均薄  
厚侈弇之齊以諧清濁聚精會神鳩工於其間弘誓既  
達昏疑皆破故衆心如城施者如市大悲之感與萬靈  
接況祝融回祿髣髴交應越五月辛丑新鐘成於是此  
邦民大會膜拜縱觀盈川塞衢億兆諦聽鯨魚乃發訇  
然如扶搖號而萬竅怒霹靂作而崇山破在坑滿坑在  
谷滿谷金界岌岌若震若蕩既而拘怒散渙與迴飈俱  
激越若大千周流六虛經于嚴城入於梵宮徘徊乎霜

天凌厲乎清夜千門徹萬戶警魚龍皆奮蟲豸不蟄於  
是聆其音者貪駭遷善聾盲知方識浪安流地獄清涼  
吒王解刑刀輪摧藏嚴乎心者聞聲以知受觀受以悟  
法若露清耳根鏡照身業彼金鼓聲氣木鐸循路整衆  
孚號方斯陋矣蓋聖人弘道以勸善因善以建法作法  
器以為天下利利者教之果法者教之因善者教之宗  
我鐘乃懸是訓是崇世界有極太音無窮

頌

慶鴻名頌并序

唐興百三十有八載皇帝在宥天下鑄五兵為農器栖  
萬姓於壽域道證德洽神人以和春正月冢臣上將鄉  
士庶尹洎三老五更公侯伯子男相與揭厲皇猷請增  
明號上撫謙而未許也僉曰陛下孝達神明道超先帝  
以德則符廣運以時則復大朴以功則保定丕業格于  
上下而尊稱猶淺鴻名未光億兆之心何戴神祇之望  
何塞天子南嚮而讓者九不得已而俞之乃命有司具

昭告之禮二月乙酉備法駕朝太清宮敕宮神以洒掃

詔月將使警蹕雲動天旋至于靈壇報功乎三清祈禱  
乎上玄景戌享太廟用明水越席玉豆彫簋之禮燭蕭  
以合薌灌鬯以報魄神休擁而萬靈接精意陳而六幽感  
丁亥朝羣臣于蓬萊前殿於是四方人大和會命太尉  
班五瑞合六樂遂展禮奉策虔受大號曰開元天地大  
寶聖文神武證道孝德皇帝是日也解商野之三網受  
塗山之萬玉大赦天下與人更始協時月同度量贊傑

俊書雲物恤高年禮大祗接天瑞受地釐撫柔萬邦存  
省其安危遂迎日推箕布慶行賜扇薰風調元氣拓千  
歲之大統操三皇之遺珠垂其衣裳與天地合符樂遍  
禮崇乘輿乃入然後屏椒房而徹黃屋徜徉乎太庭氏  
之館泊兮凝神恍兮存真想洪崖廣成之倫披霓裳而  
下鳳闕蹁躑左右上千萬壽凡遭逢昌運沐浴聖渥而  
不能頌蒸人賦江漢吉甫仍叔之罪也臣敢有二事仍  
作頌曰

穆穆閼宮敷時繹思天有成命孝孫受之鋪衍下土報  
功神祇我瑞如山我福孔夷聖敬攸感上玄豈私誕受  
鴻名載揚緝熙風動雲行雨飛露垂昆蟲昭蘇草木阜  
滋恭已南面無為之師栢皇尊盧萬代一時昭假遲遲  
上帝是祇永錫多祐萬壽無期

碑

陳留郡文宣王廟堂碑銘

并序

唐天寶十有一載歲次壽星陳留郡守河南道採訪處

置使元彥冲所以崇德樹風敬教勸學初公以三務之  
隙分命有司修廢功舉墜禮而此堂也舊規偏陋下宇  
將壞我是以有經始之制冬十月丙午新宮成凡天下  
有道則文教大洽為政者克廣舊典以尊先聖禮也浚  
儀令河東裴勝叶恭大猷祇奉成績乃立石於廟庭以  
旌盛德所庇云

有三才然後有剛柔剛柔交而利害作乎其中於是橫  
目蚩蚩天不能節黃帝堯舜氏始以仁義拯溺其流及



乎夏商而周監二代有明堂之禮樂教之首也逮德下  
衰王室卑而五霸起彛倫墜而六學缺天將持其木鐸  
以授後聖由是周公歿五百歲而夫子生雲從龍風從  
虎大道既作天下化成故夫子修詩書以酌虞夏殷周  
之損益而國風帝典備約魯史記以書二百四十二年  
之廢興而亂臣賊子懼烏戲不大壞何以見聖人之全  
功乎粵若中都之制立民極也以匡頹風防不為曲兩  
觀之法用重典也以去奸宄政不為苛夾谷之會誅無

禮也以尊兩君刑不為僭三預是邦之政而魯至於道  
向使鳳鳥來河圖出東周之化其在魯乎嗚呼明王未  
興亢龍無輔運匪我與德兮何衰蓋弘其道以救物處  
其順以安時行藏屈伸與化推移也其世衰也揭仁義  
於天下其大來也啟土宇於身後出入百代波流萬方  
孰不日用聖猷欽若祀典然後知素王之德與天地並  
或曰夫子栖栖魯衛陳蔡之間或者其未智歟君子曰  
是智也聖人與時消息同彼憂患不有匡蒲之難麟鳳

之感何以試苟合安蒙求使達者順時窮者知命然則  
卷舒之跡其可究乎奕奕新廟庶人成之有以見誕敷  
之德勿亟之化蓋黜陟其楹玄端其服加豐器之等正  
當宁之位王命所以寵舊章也兩楹之下四科以班充  
公東序西嚮費侯齊侯黎侯吳侯衛侯西序東嚮其餘  
未入於室者畫衣冠於西牖配祭所以辨等威也議者  
謂我邦君於是乎建宏規而播新命修令典而崇明祀  
講義以度公懋功以從時訓人以成德昭德以合禮六

者禮之善物而時有遷邑有改不銘考父之鼎紀奚斯之功是廢名也何以示後嗣遂命客卿前封丘縣丞泗上陳兼志之其詞云

缺

阮公嘯臺頌并序

按晉陽秋阮公諱籍字嗣宗陳留尉氏人也夫雲蒸於山不擇時而出故公以全德生於衰世于時中州多故大道浸缺於用者知膏火自鑠逃乎累者懼木鴈兩傷公由是內張道機外隳天殼土梗聖智粃糠軒冕遂登

廣武以覽古望梁臺而寓詞埋照於竹林放神於蓬池  
德充也爾其興懷昔遊故為東平相貽情善釀故受步  
兵校尉弛張遽寧之際出處夷惠之表否泰莫得介於  
靈府名實不足汨其冲氣螭螭龍卧與道偕隱所以沉  
吟志全慷慨神王獨立長嘯遺榮此臺當其寓興也蓋  
將毫視泰山囊括顥氣頽然自得與造化者為友故卷  
其用而懷之世莫得而窺也其外物所感則寄之翰墨  
焉謂道莫至於專氣抱一於是著釋老論哀莫大於矯

時死名於是有弔比干文情動於中而形於言賦詠懷  
詩問道蘇門笑而不答作大人先生傳歲在玄默余登  
大梁之墟墟中之人方誦公遺慶歎玄風蕪沒議樂石  
以旌朽壤余採其故事之存於糟粕者勒而為嘯臺頌  
頌曰

天下多故賢人穀恥隱於沉飲以俟傾否越禮逃用晦  
德忘已不知我者謂我狂且長嘯懷人詠古著書感時  
而慟非必窮途汚彼汴水東流無返跡是人非荒臺可

踐升高延佇想見青眼道烏乎在日逝日遠

一本云五運相錯三

徵交戾天地之氣有時而閉君子迷陽亦既懸解萬象  
離境一盃韜世大辯不言至清無徒冷然長嘯味道之  
樞神和天倪跡寄窮途物我兩忘獨與化俱湯湯汴河  
東流不返之子已往德音日遠荒臺未傾嘉樹勿剪升  
高延佇想見青眼山有菜隰有薇逝者  
不作吾誰與歸望古刻石永昭清徽

論

吳季子札論

謹按季子三以吳國讓而春秋褒之余徵其前聞於舊  
史氏竊謂廢先君之命非孝附子臧之義非公執禮全

節使國篡君弑非仁出能觀變入不討亂非智左丘明

太史公書而無譏余有感焉夫國之大經實在擇嗣王者慎德之不逮故以賢則廢年以義則廢卜以君命則廢禮是以泰伯之奔勾吳也蓋避季歷季歷以先王所屬故纂服嗣位而不私泰伯知公器有歸亦斷髮文身而無怨及武王繼統受命作周不以配天之業讓伯邑考官天下也彼諸樊無季歷之賢王僚無武王之聖而季子為泰伯之讓是徇名也豈曰至德且使爭端興於



上替禍機作於內室遂錯命於子光覆師於夫差陵夷  
不返二代而吳滅以季子之閔達博物慕義無窮向使  
當壽夢之眷命接餘昧之絕統必能光啟周道以伯荆  
蠻則大業用康多難不作闔廬安得謀於窟室專諸何  
所施其匕首嗚呼全身不顧其業專讓不奪其志所去  
者忠所存者節善自牧矣謂先君何與其觀變周樂慮  
危戚鍾曷若以蕭牆為心社稷是恤復命哭墓哀死事  
生孰與先釁而動治其未亂棄室以表義掛劍以明信

孰與奉君父之命慰神祇之心則獨守純白不義於嗣  
是潔已而遺國也國之覆亡君實階禍且曰非我生亂  
其孰生之哉其孰生之哉

毘陵集卷七

謹案卷六第二頁前四行而殷人郊冥而祖契原  
本冥訛畧今據禮記改

第六頁後四行君奭原本奭訛奭今據唐書改

欽定四庫全書





總校官庶吉士

臣

侍朝

校對官庶吉士

臣

陳崇本

膳錄監生

臣

王世臣

太子少傅楊公遺愛碑頌并序

碑三首

唐故睢陽郡太守贈祕書監李公神道碑銘并

序

唐故朝議大夫中王府司馬上柱國贈太常卿

韋公神道碑銘并序

唐故朝議大夫高平郡別駕權公神道碑銘并

序

欽定四庫全書叢要

集部

毘陵集卷八至十

詳校官助教臣常循





欽定四庫全書薈要卷一萬三千七百二十三

集部

毘陵集卷八

唐 獨孤及 撰

頌 二首

唐故太子賓客兼御史大夫洪州刺史洪吉八

州防禦觀察處置使平原郡開國公張公遺愛

碑頌 并序

唐故開府儀同三司試太常卿兼懷州刺史贈



太子少傅楊公遺愛碑頌并序

碑三首

唐故睢陽郡太守贈祕書監李公神道碑銘并

序

唐故朝議大夫中王府司馬上柱國贈太常卿

韋公神道碑銘并序

唐故朝議大夫高平郡別駕權公神道碑銘并

序

頌

唐故太子賓客兼御史大夫洪州刺史洪吉八  
州都防禦觀察處置使平原郡開國公張公遺

愛碑頌

并序

北斗魁戴匡六星曰文昌宮其三曰貴相聖人法天建  
官作為台司以左右民於是乎有敬敷五教平章百姓  
之職居之者下代天工上應星宿其或一麾出守八命  
作牧內為吉甫外為方叔弘道利物其政一也惟唐七

世皇帝誅羿浼篡舊服得柱石之臣曰平原張公諱鎬  
字從周秉中庸之德含光大之量輟耕隴畝為唐臯夔  
推轂於河南樹風於荆門作賓銅樓登侍禁掖牧撫人  
半歲洪州再稔鰥寡不侮神人咸若慈惠之政洽於百  
城享壽六十有一歲在癸丑七月壬寅薨於位夫德之  
被物也厚則物之興感也至故公之捐館自九江至于  
敷淺原南暨於梅嶺東臻於閩徼而蚩蚩之民靡幼靡  
艾泣涕乎遺風悽愴乎棠陰懇乎若求而不得企而不

及者僉曰平原其可謂盛德也已子惠困窮俾富而庶  
若解衣衣我輟飯飯我公棄我往矣誰育我矣逝矣遠  
矣音徽沫矣吾儕小人嗚呼疇依盍詠哥之刻諸金石  
秋八月既殯者壽吉州安福縣丞鄧琳玉等一百十有  
五人乃率籲衆感謀及故吏從事州長縣尹虎賁亞旅  
卿大夫相與稽手陳迹見頌表德用廣留侯之世家紀  
子產之遺愛禮也公曾祖曰善見位朝散大夫越州司  
馬司馬生武定任荊州都督府戶曹叅軍戶曹生知古

官止代州司功叅軍廣德元年贈太子少傅自司馬至少傅世以儒顯天鍾美於其後嗣四世而生平原河目犀額山立玉色森然若大厦棟梁清廟祭器該綜六學大抵以周易為師將探化元恥觀朶頤隱居南山蓋三十朞天寶十有四祀始褐衣召見凡用舍繫乎才行止牽乎時當無為無事則許由善卷各得安其節及人思俾乂則黃公用里不能逃于用勢使然也由是一命左拾遺再命右補闕修國史三命侍御史四命諫議大夫

五命中書侍郎同中書門下平章事起布衣三歲綰相  
印佐王業名敷之盛耀動今古於時至德二載也天子  
方以復夏之師蒐於岐陽三河之人左衽是懼公入除  
百揆出分二陝帥東諸侯之兵收復宋鄭誅後至者以  
懲不恪安危之機懸於方寸方將董正東夏懷柔山戎  
會帝咨百工曰有能典朕荆楚俾姦宄不作予惟克邁  
乃訓於是拜公荊州大都督府長史明年元良肇建上  
曰疇若予樂正父師之職汝作賓客卒調護太子嘉言

惟允於是授太子賓客上思夙夜出納言語侍從之臣  
命公作左散騎常侍會鍾陵鄱陽之間人咨艱食上又  
曰命汝作州伯摠十聯之任俾予全無虞惟汝賢於是  
有洪州之拜粵寶應元年冬十月公朝服受命至自臨  
川彰善用明瘳惡用威一法度用信布愷悌用德慰薦  
掾吏勞徠鰥寡化以公廉扇以禮讓煦而嫗之使自得  
清而靜之使自定於是豪民猾吏革面斂手家有忠信  
人懷恥格暢於事業播於風俗浹於人心被於詠歌是



歲也三吳飢民相食厲鬼出行札喪毒痛淮湖之境骼  
胔成岳而我倉如陵我民孔阜犬牙之境疫癘不入災  
不勝德也臨海賊帥袁晁狃於會稽之役侵我東鄙江  
界大恐民斯繹騷公命左軍屯上饒隘塞常山之口斬  
其搪突者二千餘級自是姦黨散落不敢南向而諸郡  
人安焉舒城賊帥楊昭憑蜂聚之衆殺同安郡守劉秋  
子以叛師潰而奔犯我疆場公覆而取之懸其首於五  
達之衢凶徒殲焉沈千載者新安大豪結椎剽掠之黨

為之囊橐弄兵潢池度劉我民桴鼓之聲相聞郡國二千石不能禁公命次將斬之以徇鉏其根株俾無遺類新安民庶家室相慶江干清焉振六條之宏網開布大信從善如流視民如赤子克已推誠以百姓心為心飲之以和俾服從教化輕剽皆竊奪攘矯虔之俗罔或干正慆懣蹇亟苛察繳繞之吏不能見其巧哀敬明庶期於無訟德政行焉慎選乃僚必國之良有若博陵崔賁昌黎韓徊趙郡李惟岳北海王士華河間邢宙河東裴

孝智隴西李道昌皆卿材也以嘉言碩畫叅公軍事澄  
清之內無濁流審克之下無冤民淑德旌焉公之解短  
褐而施國章也十有一年矣雖匪躬之故宣力不暇而  
滄州願言未始彌忘每曰少伯子房吾之師也累乞骸  
骨將角巾故山朝廷方虛三老五更之位待公而除書  
未下而公薨焉嗚呼哀哉褒德之盛典退身之正志享  
用之遐福三者俱未從人欲斯可以歎矣唯公出將入  
相文武為憲謹言成畧藏在策府代莫得而聞也今采

其德刑禮義之善利物者頌之於石慰彼墮淚者之心  
焉爾其文曰

純粹之氣升為星辰降為賢人皇王得之以釐百工以  
隲下民九江之南五品不遜百姓不親平原來斯道之  
以德俾民化淳寬厚清靜飭躬率先是訓是勤猛獸不  
噬夜犬不吠豐年來臻藹藹令德家有膏雨戶有陽春  
牧我若暮棄我若早實天不仁南州寥寥東山依依德  
音若存千載之後魂魄登此頌聲不泯

唐故開府儀同三司試太常卿懷州刺史贈太

子少傅楊公遺愛碑頌

有序

皇帝嗣位二載河內得賢二千石曰猗氏楊承仙者剛  
毅公廉仁明愛人起鞞鼓間為唐循吏天性貞方非有  
經術潤飾推誠馭衆以身帥先民用不擾政是以茂於  
時王師始平河北而覃懷纔歸於我大兵之後城郭為  
墟相國梁公拔公於戎馬之上表為刺史俾慰安斯人  
公既至則弔其瘡痍為剪荆棘省事節用寬其征而均

其力然後濬決古溝引丹水以溉田田之汙萊遂為沃  
野衣食河內數千萬口流人襁負不召自至如歸市焉  
鰥寡無告不能自耕者貸其種與農器而教之視五穀  
所宜督其程課勞來不怠使民無不咸返其本每循行  
屬縣問所疾痛時其飢飽心為慘怛如身之恤臂指慈  
父之視幼子也性嚴殘而恭於奉法訓軍以律禁暴以  
肅有抵刑者雖拔葵犯禾殺之無赦由是兵不為盜猛  
獸不食人河內之犬無夜吠者人人得敦其業而厚其

生上奇其能以璽書勞勩封弘農郡公邑二千戶拜其  
男銳河南府叅軍方倚以牧人不遐其福大厯二年八  
月六日公薨於州春秋五十四皇帝悼惜詔曰軍興已  
來列郡凋耗二千石少能以教化稱者唯承仙苦心精  
力惠此一州家給而人知禮節氣和而無災害三年有  
成表課第一賢守既歿誰其嗣之宜贈太子太傅好事  
者謨公景行謂公清直強力能勤其官百城之州三軍  
之帥可使居其任量不極而歿惜哉初岐國公魯炆之

守襄鄧也公為新軍佐敢殊死督戰奮士卒先蘭矢石  
亂中敗面滅鼻而不言病卒以是挫敵軍中服其義  
勇及涼公秉鉞而委質焉前後保河陽守高平安潞  
鎮鄴董戎壺口戮力危機之中賈勇倉卒之間唯盡  
敵是求未嘗顧身元戎賴之卒集大勲由是歷羽林  
金吾光祿大夫加開府儀同三司試太常卿而後至  
於是州也公嘗表請歸葬途由於洛洛陽人聞楊懷  
州之至也環而觀之及其還也懷人數千須於路其



亡也闔境相弔童子不巷歌凡立誠應物者信不足則不信飾智沽名者實不足則名喪若楊公者非仁必由已而誠在言前則不能使千萬人悅之之速如是某官某耆壽某等願復攀公之朱轡望公之清揚而靡因也故立石為碑慰彼永思云

吳公文翁遭時無危因而綏之其績易施公之來斯大盜始夷師旅饑饉丁於此時頑民反側比屋流離飲公醇仁而忘怨咨飢者得食寒者得衣豈知典謨以吏為

師豈必法令信則不欺功倍古人愛及斃廢宜從人欲  
俾壽無期嗚呼不傭舍我曷歸公俾我活何以報之我  
思公兮泣淚此碑

碑

唐故睢陽郡太守贈祕書監李公神道碑銘

并序

漢家之建侯親親也以荆燕吳楚為首封而後嗣多材  
世濟厥美辟疆路叔更生子駿比肩而出慶鍾故也唐  
有天下肺腑是依有若江夏淮安河間東平以明畧茂

勲左右大業其休德粹氣降為百祥公子公孫或哲或  
仁勤勞王家焜耀國謀從東平三葉後生睢陽言春秋  
者謂公族多士與炎漢侔矣公諱少康字某太祖景皇  
帝五代孫太祖生雍王繪雍王生東平王詔東平王生  
高平王道立高平王生畢公景淑初畢公娶於太常京  
兆韋萬石女有才子三人伯曰孟康忠敬直溫謙光不  
耀官至太子左贊善大夫仲曰仲康弘毅密重文敏貞  
諒由尚書主客郎中剖符楚州楚人至于今由其教而

思其躅公楚州之母弟也纂二昭二穆慎身之烈迪元  
方季方裕蠱之範家貽其謀天鍾其休故蓄為和氣播  
為盛德年始孩而畢公捐館七歲受孝經至喪親章捧  
書孺慕哀哽不食隣伍長幼為之涕泗既冠遭太夫人  
棄孝養苴貌茹毒血泣無聲者三年自是孝稱鄉黨名  
冠宗室會垂拱永昌已後天下有驚喙之謠七廟支庶  
不絕若綰公正志蒙難危行全德貞厲二十年以侯道  
長中興後乃筮仕由朝邑縣尉凡七徙官至尚書祠部

郎中以太府上佐授潞州司馬因考績彰聞拔為青州  
刺史於時海岱貢篚衣履天下俗尚夸侈吏務豪奪公  
以德禮示法度以誅賞禁淫怠宣明教化飭行帥先使  
刺繡倚市者悉返耕織於是貪者廉善者勸海濱之俗  
變至鄒魯按察使戶部侍郎宋遙以狀聞璽書褒異遷  
公於常州賜一子出身常之吏民望公風聲其奇袞僭  
濫者解印綬自去比及下車無為而人和復以高第擢  
拜徐州刺史先是歲比大歉人流者什五六公條奏逋

逃之名削去其版然後節用務本薄征緩刑以來之歲  
則大穰人不患寡浮游自占者至數千萬優詔嘉歎賜  
帛二百匹玄宗後元年改宋州為睢陽郡命公為太守  
淮湖漕輓刀布輻湊萬商射利姦之所由聚也公謂非  
勝之艱安之維艱故峻其浸漁之令宏其并容之仁吏  
或不廉不恪不惠不迪糺之結之必誠必信誠信不欺  
故獄市不擾閭井輯睦由是飲純固之德者如饅者得  
哺寒者得纊有司方將計課以聞天不惠於宋乃崇降

癘疾三年春賜告歸洛陽是歲十二月丙午薨春秋六十有四宗室悽愴士友失圖宋人徐人輟春相唁明年某月遷宅兆於京兆見子原先塋禮也公雅善屬詞有集二十卷晚節住禪味耽道論嘗傳道德上下經五千言為之訓解以究微旨其為政貞方廉靜明達端懿嚴不殘直不訐清不矯時善不徇名友交推誠好惡中節博見強志親仁愛士居險用晦遭時利往行藏之機與道屈伸未始以去就寵辱瀆其出處而壽位未極其量

也故休祐復集於後昆夫人某縣太君廣平程氏生元  
子曰涵以忠文孝讓儀刑王室天子謂可內司九法外  
鎮百城大厯七年夏五月由尚書兵部侍郎為御史大  
夫蘓州刺史巡省江左邁德貽訓之所及也夫人沛國  
武氏以繼室生仲子汗汗弟濃皆公材而不幸早世某  
月日朝廷建推恩之令追贈公祕書監大夫之孝達於  
祖禰也及嘗忝禮官之屬知王侯之廟祧昭穆與功  
烈德善故受命於大夫酌而為之志著之樂石以代



烝彝曰

敦叙九族皇風所始公生德門運叶麟趾王曰叔父高  
陽才子纘乃祖服似續介祉底績三署舊章孔修赤舄  
彤襜牧彼四州明照姦訛仁覆隱憂神罔時怨民斯輯  
柔民之不幸公壽不永王曰彼天匪慙俾屏仁浹鰥寡  
道在烝彝臧孫有後遺烈煥炳

唐故朝議大夫申王府司馬上柱國贈太常卿  
韋公神道碑銘

并序

楚元王傳後五世長孺相漢始自魯國徙家杜陵其後  
十六世孫景畧仕魏為青州刺史青州生隨倉部侍郎  
南皮公瓚南皮生三子皆才同時為郎長曰季武實居  
主爵次曰叔諧典司庫部季曰叔謙歷吏部考功時人  
號為三列宿考功生知人以司庫員外郎為職方郎中  
自長孺至青州二丞相一侍中十一二千石自南皮至  
職方二葉五尚書郎為當世言婚官者謂之郎官韋家  
梗柎瑤琨非崇山濬源不生故公侯卿大夫實鍾德門

事業名聲與冠蓋俱四牡龍旂之慶百年彌熾盛矣哉  
公諱縝字某職方之仲子也忠廉無邪溫直好禮用誠  
明博厚祇若祖考之訓雖顛沛不違仁非得之不苟求  
言足以成事濟衆默足以居易慎獨鄉舉經行吏部登  
賢能拔授祕書省校書郎親累徙官再遷至亳州臨渙  
縣令寬信愷悌之政行乎千室暮年而頌聲興遷薛王  
府文學轉祕書郎王公圖牒天祿典籍公皆以儒服叅  
焉藝文修而彛章叙歷佐濮徐仙三州清恪如一入為

申王府司馬以達才居陪臣之列弘道以奉職安義以直已諫從政肅緊忠亮是賴掌邦典者謂王門之治可移於公卿方議登之三府會寢疾終於位是歲開元十二年歲在甲子冬十月二十二日春秋若干夫人河南元氏益州唐安縣主簿知柔之女承先祖供祭祀之謂職閔勤勞勸以義之謂德莊敬恭慎婉婉聽從之謂禮顧復勞瘁均養善訓之謂慈夫人兼有焉某年月春秋若干卒某年月日合葬於某原嗚呼才宜貴仁宜壽世

祿宜富三者公夫人皆居其地不臻其分鄉黨宗族以  
命不可說相弔焉唯明德必有後之言也信有若孟子  
幼成博見利器鏗若金錫天寶十年自尚書兵部郎出  
守漢中兼山南西道採訪處置使移典河內河內人至  
今頌之仲子幼卿洛陽縣丞叔子幼奇宋州楚丘縣令  
季子幼章有貞幹密識恭寬而明前後八執憲而再起  
草自兵部郎中持節典泗楚二州錫金印紫綬咨以屯  
田贍軍食如漢營平侯故事以言以立皆公之教訓也

寶應二年春三月以子為大夫故詔追贈公太常卿君子謂公之義方慶及其身而楚州之孝誠格於宗祏禮也猶以為與化俱者人事不我期者丘隴雖大宗小宗可詳諸姓氏譜命官日時各存乎屋壁之志若遺直與故事非金石刻則無以示後世也繇是楚州稽首於廟見託謨德垂懿萬億孝思罔極其銘曰

肅肅乃祖翼商屏周摠羣邦兮退傳間生扶陽重侯德乃降兮龜紐虎符黼衣彤弓世相付兮百代純嘏鍾仁

於公德斯懋兮為邦三年足民知方政之臧兮校文石  
渠觀書魯堂志自強兮三佐列郡曳裾遊梁道未光兮  
已矣介福不充景行于嗟命兮一經之遺垂裕果盛衰  
榮並兮子子孫孫丕承忠敬荷餘慶兮

唐故朝議大夫高平郡別駕權公神道碑銘

并

序

開元天寶之際玄宗始以八柄付三公由是台司得專  
其廢置其中或憑寵固位懼天下有異已者諸附離之

者皆出入三臺若公才令名以望見憚則稍稍優其俸而黜其職故天水權公幼明由新安縣令為絳郡司馬高平郡別駕而歿同於道者皆竊歎之是歲天寶六載秋八月也歿後二十有二載歲次己未春二月返葬洛陽故瑩夫人新鄭縣君滎陽鄭氏祔焉縣君某縣某官某之孫某之子以仁儉好禮輔佐懿德柔明之風訓齊閨門壽六十五大歷二年十月某日終於丹陽初公娶於博陵崔氏生子曰驛而終新鄭以繼室生四子曰軼



曰申曰器曰舒舒不幸短命驛軼申器悉忠信好學善屬文位未顯而令名歸之慶之垂訓之流也至是既卜宅兆驛等懼日月逾遠後裔不知其先人之德善謂及忝鄉舉之舊故使錄而銘之云公諱徹字幼明隴西天水人也權氏之先出於顓頊其遠祖殷武丁之小子生而手文曰權因以權受封且命氏焉至周為楚武王所滅國除其後有仕隴西者遂家於天水歷漢魏晉宋間子孫世為都尉郡守至裔孫翼與王景畧同佐苻堅官

至僕射後僕射數世至景宣景宣生士玠並知名於時  
士玠生萬春歷華州刺史封千金縣公華州嗣右領軍  
將軍曰文獎領軍嗣永興令曰懷育公永興之嗣也奕  
葉之明德粹氣聚於其躬故融而為仁行播而為文學  
童子時舅氏崔湜奇其文嘗謂有何無忌之似其鄉舉  
也考功郎中蘇頲拔諸羣萃之中連尉湖城汾陰新繁  
渭南河南五縣開元二十三年拜監察御史會監祭太  
廟時同會事者約相與偕赴及將赴祭約者有故不至

遽不暇告公曰人約我矣可先已而後信乎遂不赴坐  
是降為河南府法曹君子義之初選部舊制每歲孟冬  
以書判選多士至開元十八年乃擇公廉無私工於文  
者考校甲乙丙丁科以辨論其品是歲公受詔與徐安  
貞王敬從吳鞏裴肅李宙張烜等十學士叅焉凡所升  
獎皆當時才彥考判之目由此始也於時天下無兵百  
二十餘載搢紳之徒用文章為耕耘登高不能賦者童  
子大笑公攘臂其間以仁義為已任片言隻字動為學

者所法時輩榮之而居家清方唯德禮是仗潤身飾吏  
不過經術不矯持操以游媚貴倖行威作福者忌之由  
是官徙而階不遷從法曹數歲而後有新安之拜及至  
歷絳郡高平任愈踈遠安貞中立未嘗易方虛舟其心  
與位升降春秋六十四而終蓋道之行止與時不并論  
論者以漢梁叔敬桓君山為比公所著文二十卷其立  
言之宗趙郡李華編而序之若世系事業則書諸斯文  
其文曰

咍兮權公有德有言忠恕廉清道真而溫行有餘力足  
言斯文居官釐績勤約是守與朋以信寧出不苟跡屈  
志伸義彰身後冉政游學左詩潘誅風流遺烈足以遺  
子九原與歸末由也已

毘陵集卷八

欽定四庫全書薈要卷一萬三千七百二十四

集部

毘陵集卷九

唐 獨孤及 撰

碑銘 三首

唐故揚州慶雲寺律師一公塔銘

并序

福州都督府新學碑銘

并序

舒州山谷寺覺寂塔隋故鏡智禪師碑銘

并序

山谷寺覺寂塔禪門第三祖鏡智禪師塔碑陰

文附錄

碑銘

唐故揚州慶雲寺律師一公塔銘

并序

公諱靈一俗姓吳廣陵人也神清氣和方寸地靈與太  
初元精合其純粹聞思修惠介然生知九歲出家三十  
斷結嚴持律藏將紹法寶示人文學以誘世智初不計  
身中有我我中有身德充報圓緣斷相滅寶應元年冬  
十月十六日終於杭州龍興寺春秋三十有六臨滅顧



命以香木茶毗為送終之節門弟子虔奉遺旨粵以是月某日焚身於某山起塔於某原從拘尸城之制也右補闕趙郡李紆殿中丞侍御史頓丘李湯嘗以文字言語遊公廊廡至是相與追錄遺懿以詔塵劫謂公貞靜直方淵遠弘大而密識洞鑒天倪道機注不滿酌不竭冲如也自受生至於出家貪恚不入念哀樂不見色自出家至於涅槃六根不染欲界之塵自知道至於返真雙履不踐居士之門公之嚴持也初公之先世為富家

既削髮推萬金之產悉以讓諸孤昆季所取者唯衲衣  
錫杖及身而三捨七界五欲如棄涕唾公之純白也其  
所底止必擇山間樹下無塵垢之地初舍於會稽南山  
之南懸溜寺焉與禪宗之達者釋隱空虔印靜虛相與  
討十二部經第一義諦之旨既辯惑徙居餘杭宜豐寺  
隣青山對佳境以嶺松澗石為梵宇竹風月露為文室  
超然獨往與法印俱自是師資兩忘空色皆遣暴風偃  
山而正智不動巨浪沃日而浮囊自安於是著法性論

以究實諦公之懸解也公智刃先覺法施無方每禪誦  
之隙輒賦詩歌事思入無間興含飛動潘阮之遺韻江  
謝之闕文公能綴之蓋將脗合詞林與儒墨同其波流  
然後循循善誘指以學路由是與天台道士潘清廣陵  
曹評趙郡李華潁川韓拯中山劉潁襄陽朱放趙郡李  
紆頓丘李湯南陽張繼安定皇甫舟范陽張南史清河  
房從心相與為塵外之友講德味道朗誦終日其終篇  
必博之以文約之以修量其根之上下而投之以法味

欲使俱入不二法流公示教之無窮也內張天機外與  
物接捨法無我以虛受人曠焉若空谷之响止水之像  
優而柔之使自得之其道樞未始不無為也而飲其和  
者亦虛而來實而歸明徵其所以然則不得其朕公應  
之無涯也宜豐寺地臨高隅初無井泉公之戾止有靈  
泉呀然而涌噴金沙之溜於禪庭左右挹之彌清斟之  
無窮公精至感物也嗚呼自發天啓壽量彼一劫住世  
聖道以拯校喪得大雲而涼大宅其公平吁嗟昊穹奪

我善友使生不極其涯道不竟其源豈前已就緒有可  
出將轉現他方乎為應化之始終法身之去來非思議  
所及乎凡今學徒戒歸若涉大水而無梁抽毫強名以  
志陳迹其銘曰

茫茫五濁愛習如債何以為師尸羅之戒卓爾上士一  
念識滅萬法懸解持佛密藏名離性空俾道勿壞破魔  
結壤穎脫諸有獄視三界上德不器大道無方天縱之  
文亦和其光發彼蒙童啟迪思量我今令入直心道場

奈何法船今也則亡適來豈逆適去豈順施未及晉天  
胡不慙飛鳥無迹法雷罷震福庭空虛來者曷問言之  
糟粕留為秘印

福州都督府新學碑銘

并序

世與道交相與喪弘之者在人非庚桑楚不能使嚬壘  
大壤向唯文翁蜀學不崇閩中無儒家流成公至而俗  
易民賴德施古今一也初成公之始至也未及下車禮  
先聖先師退而嘆堂室湫狹教學荒墜懼鼓篋之道寢

子衿之詩作我是以易其地大其制新其棟宇盛其俎  
豆俎豆既修乃以五經訓民考校必精絃誦必時於是  
一年人知敬學二年學者功倍三年而生徒祁祁賢不  
肖競勸家有洙泗戶有鄒魯儒風濟濟被於庶政大厯  
十年歲在甲寅秋九月公薨於位於是羣吏庶民耆儒  
諸生雨泣廟門之外若有望而不至號曰宣天不欲斯  
文之漸漬於東甌之人歟不然何錫厥教化而不遐公  
之年也吾黨矍然嗚呼曷歸判官膳部員外郎兼侍御

史安定皇甫政殿中侍御史潁川韓贄監察御史河南  
長孫繪率門人部從事州佐縣尹相與議以公之功績  
明示後世謂及嘗同司諫之列宜備知盛德善政見託  
論譔以實錄刻石曰公諱椅字某皇帝之諸父宗室之  
才子寬裕而愷悌孝慈忠敬莊而成式文而強力治王  
氏易左氏春秋酌其精義以輔儒行故居處執事著書  
屬詞非周孔軌躅不踐也天寶三載應選部辯論為安  
陽尉中興之後歷御史尚書郎諫議大夫給事中十餘



年間周歷三臺言中曩倫動中大本上交不諂下交不  
瀆家貧不樂清近求為京兆少尹無何出守弘農弘農  
人和移典華陰兼御史中丞華陰之近者安遠者來天  
子以為才任四嶽十二牧之職大厯七年冬十有一月  
加御史大夫持節都督福建泉漳汀五州軍事領觀察  
處置都團練等使八年夏四月龍旂六轡至自京師閩  
越舊風機巧剝輕資貨產利與巴蜀埒富猶有無諸餘  
善之遺號為難治公將治之也考禮正刑節用愛人頌

賦遣役必齊其勞逸視年豐耗量入以制用削去事之  
煩苛法之掊克者使吏不奉職民不帥教則懲以薄刑  
俾浸遷善由是人知方矣公將安之也初哥舒晃反書  
至公履及於門遽命上將帥戈船下瀨之師西與鍾陵  
軍會先拔循潮二州以援番禺推誠誓衆士皆奮勇既  
而大憝就戮五嶺底定民是以康繫我師是賴人無姦  
宄寇賊之虞矣公將教之也考類宮之制作為此學而  
寓政焉躬率羣吏之稍食與贖刑之餘羨以備經營之

費而不溷於民也先師寢廟七十子之像在東序講堂  
書室函丈之席在西序齒胄之位列於廊廡之左右每  
歲二月上丁習舞釋菜先三日公齋戒肆禮命博士率  
胄子修祝嘏陳祭典釋菜之日釁器用幣籩豆在堂樽  
罍在阼公玄端赤舄正詞陳信是日舉士之版視其藝  
之上下審問慎思使知不足教之道之講論以勗之八  
月上丁如初禮歲終博士以遜業之勤惰覃思之精粗  
告於公斂其才進其等而貢之於宗伯將進必以鄉飲

酒禮禮之賓主三揖受爵於兩壺之間堂下樂作歌以發德鹿鳴南陔由庚嘉魚南山有臺以將其厚意由是海濱榮之人以不學為耻州縣之教達於鄉黨鄉黨之教達於衆庶矣公薨之明年太常議按公叔發修衛國之班制以交四隣故易其名曰文孔文叔其勤於公家夙夜不懈衛人銘其彝鼎以公尊教而勸學德洽荒服乃奏謚曰成詔贈禮部尚書而刻金石之禮則闕而未備今也敢播德馨貽之無窮其銘曰

公之文肅恭且仁宣力事君潤飾經術底綏斯民公之  
武鰥寡不侮剛亦不吐率師勤王戡厥醜虜公之移風  
經始頻宮百堵皆興孔堂崇崇四科以班乃侯乃公秩  
秩祀典鏘鏘禮容大昕鼓徵學士萃止褒衣方屨登降  
以齒從公于邁樂我泮水我廬我里講誦資始比屋為  
儒俊選如林縵胡之纓化為青衿公宜難老為學者司  
南女金反板日吉凶實天匪忱颺颺和鸞兮不聞遺音願  
言思公兮如玉如金縷餘烈於此石以塞罷市者之心

舒州山谷寺覺寂塔隋故鏡智禪師碑銘

并序

按前志禪師號僧璨不知何許人也出見於周隋間傳教于惠可大師振衣于鄴中得道于司空山謂身相非真故示有瘡疾謂法無我所故居不擇地以衆生病為病故所至必說法度人以一相不在內外不在其中間故足言不以文字其教大畧以寂照妙用攝流注生滅觀四維上下不見法不見身不見心乃至心離名字身等空界法同夢幻亦無得無證然後謂之解脫禪

門率是道也上膺付囑下拯昏疑大雲垂蔭國土皆化  
謂南方教所未至我是以有羅浮之行其來不來也其  
去無去也既而以袈裟與法俱付悟者道存形謝遺骨  
此山今二百歲矣皇帝後五年歲次庚戌及剖符是州  
登禪師遺居周覽陳迹明徵故事其茶毗起塔之制實  
天寶景戌中別駕前河南少尹趙郡李公常經始之碑  
版之文隋內史侍郎河東薛公道衡唐相國刑部尚書  
贈太尉河南房公琯繼論撰之而尊道之典易名之

禮則朝廷方今以多故而未遑也長老比丘釋湛然誦  
經於靈塔之下與澗松俱老痛先師名氏未經邦國  
焉與禪衆等大律師釋澄俊同寅叶恭亟以為請會  
是歲嵩嶽大比丘釋惠融至自廣陵勝業寺大比丘釋  
開悟至自盧江俱纂我禪師後七葉之遺訓日相與歎  
塔之不命號之不崇懼像法之本根墜於地也願申無  
邊衆生之宏誓以抒罔極揚州牧御史大夫張公延賞  
以狀聞於是七年夏四月上沛然降興廢繼絕之詔冊



謚禪師曰鏡智塔曰覺寂以大德僧七人灑掃供養天  
書錫命暉煥崖谷衆庶踊躍謂大乘中興是日大比丘  
衆議立石于塔東南隅紀心法興廢之所以然及以為  
初國中之有佛教自漢孝明始也歷魏晉宋齊施及梁  
武言第一義諦者不過布施持戒天下感於報應而人  
未知禪世與道交相喪至菩提達摩大師始示人以諸  
佛心要人疑而未思惠可大師傳而持之人思而未修  
迨禪師三葉其風浸廣真如法味日漸月漬萬木之根

莖枝葉悉沐我雨然後空王之密藏二祖之微言始粲  
然行於世間浹於人心當時聞道於禪師者其淺者知  
有為法無非妄想深者見佛性於言下如燈之照物朝  
為凡夫夕為聖賢雙峰大師道信其人也其後信公以  
教傳弘忍忍公傳慧能神秀能公退而老曹溪其嗣無  
聞焉秀公傳普寂寂公之門徒萬人升堂者六十有三  
得自在慧者一曰弘正弘公之廊廡龍象又倍焉或化  
嵩洛或之荆吳自是心教之被於世也與六籍侔盛於

戲微禪師吾其二乘矣後代何述焉庸詎知禪師之下

生不為諸佛故現比丘身以救濁劫乎亦由堯舜既往  
周公制禮仲尼述之游夏弘之使高唐后蒼徐孟戴慶  
之徒可得而祖焉夫天以聖賢所振為木鐸其揆一也  
諸公以為司馬子長立夫子世家謝臨川撰惠遠法師  
碑銘將令千載之後知先師之全身禪門之權輿王命  
之追崇在此山也則敷其風紀其時宜在法流及嘗味  
禪師之道也久故不讓其銘曰

衆生佛性莫匪宿植知誘於外染為妄識如浪斯鼓與  
風動息淫駢貪怒為刃為賊生死有涯緣起無極如來  
憫之為闢度門即妄了真以證覺源啟迪心印貽我後  
昆間生禪師俾以教尊二十八世迭付微言

自摩訶迦葉以佛所

付心法遞相傳至師子比丘凡二十五世如如禪師應  
自達摩大師至禪師凡三世共二十八世如如禪師應  
期弘宣世溷法滅獨無道全

周武帝下令滅佛法禪師隨可大師隱遁司空山十

有三

童蒙來求我以意傳攝相歸性法身乃圓性身本

空我無說焉如如禪師道既棄世將二十紀朝經乃屆

皇明昭賁億兆膜拜凡今後學入佛境界於取非取誰

縛誰解

初禪師謂信公曰汝何求曰求解脫曰誰縛汝誰解汝曰不見縛者不見解者然則何求信公

於是言下證解脫知見遂頂禮請益是日禪師授以祖師所傳袈裟

萬有千歲此法無壞

右淮南節度觀察使揚州大都督府長史兼

御史大夫張延賞狀得舒州刺史獨孤及狀

得僧湛然等狀稱大師遷滅將二百年心法

次第天下宗仰秀和尚寂和尚傳其遺言先

朝猶特建靈塔且加塔冊謚大師受聖賢衣

鉢為法門津梁至今分骨之地未沾易名之禮  
伏恐尊道教盛典猶闕今因肅宗文明盛德  
大聖大宣孝皇帝齋忌伏乞准開元中追褒  
大照等禪師例特加謚號兼賜塔額諸寺抽  
大德僧一七人洒掃供養冀以功德追福聖  
靈

中書門下牒淮南觀察使

牒奉勅宜賜謚號鏡智禪師其塔賜名寂照餘依牒至准

勅故牒大歷七年四月二十二日牒

中書侍郎平章事元載

門下侍郎平章事王縉

兵部尚書平章事李使

司徒兼中書令使

山谷寺覺寂塔禪門第三祖鏡智禪師塔碑陰

文  
附錄

嗚呼至聖者遺名久矣而司名者必從而與之其與之

何哉尊其道行其教仰不可及故立其象者所不至強  
為之名名哉非道之蘊捨名則道無從得得不得之際  
其名之寄耶我大師茂其法蛻其身去所染因際世間  
有幾千二百甲子崇巖未改前川日逝松枯蒼然光景  
如翳翹乎至誠有求舍利而建塔廟者祭乎實錄有徵  
遺言而立碑頌者於稽其意其慕之滋遠而思之滋深  
將發明之終然有待歟皇唐大厯五年舒州刺史河南  
獨孤及字至之以慈惠牧人於茲土是唯無作作則叅



於玄妙躊躇故山永懷道要貢善言於閭闔降吾君之  
明詔覺者知其本也寂者根其性也鏡者無不照也智  
者無不識也四者備矣吾師之道存焉顓顓法侶如甘  
露灌有隋薛內史道衡洎皇朝房尚書琯與今獨孤使  
君及三子慧炬相燭也文鋒相摩也嗣為之碑森列淨  
土如經星五緯更為表裏焉然述者之詞各因所見言  
或踳駁將貽惑於來世吾所辯焉薛碑曰大師與同學  
定公南隱羅浮山自後竟不知所終其銘曰留法服兮

長在入羅浮兮不復還據此南遊終不復此地也房碑  
曰大師告門人信公曰有人借問勿謂於我處得法遂  
託疾山阿向晦寓息忽大呼城市曰我於峴山設齋汝  
等當施我食於是邑居咸集乃齋於楊樹下立而終焉  
今以兩碑叅而言之則薛內史制碑之後大師從羅浮  
還付囑信公然後涅槃於茲房公以得於傳記而述之  
非徒然也其餘事業則三碑載之詳矣今則不書其錫  
名之詔與有地者之爵里行教護塔者之名號不可以

莫之傳於後也皆刻於獨孤氏之碑陰

毘陵集卷九